



Tazisius Caviezel, president Tavau, Hans Peter Michel, president cussegl grond ed Erwin Roffler, president dal cussegl grond 1996 (da san.).



Barbara Janom Steiner, cussegliera guvernativa, ses um Rudolf A. Steiner, Margret Trachsel e ses um Hansjörg Trachsel, cusseglier guvernativ (da san.).



Il vicepresidente dal cussegl grond, flancà da sia dunna Erna (dretg) ed ina dama d'onur.



Cussegljer guvernativ Martin Jäger (san.) en discurs cun deputà Daniel Albertin.

«Be tema da tschagula e dad agl»

Festa per Hans Peter Michel, il nov president dal cussegl grond

DA GION NUTEGN STGIER / ANR

■ In lieu en luna da festa è stà sonda passada Tavau. La vischnanca ha purschi in degn bainvegni a Hans Peter Michel, dapi sis dis president dal parlament grischun ed als radund 200 giasts da num e pum. Da buna luna eran dentant er ils schefs da fracziun che han divertì l'entira societad da festa. In di da stad magnific è stà la culissa per la festa da Hans Peter Michel (pld), il nov president dal cussegl grond. Avant sis dis è l'anteriuor «Landammann» da Tavau vegnì elegì sco successur dad Elita Florin-Caluori ch'è stada ils davos 12 mais a la testa dal cussegl grond. Cumenzà ha la festa a Tavau cun in cortegi da la staziun al center da congress. In inscunter cun la populaziun da Tavau è lura stà sin il program per Hans Peter Michel avant che la societad illustra è sa rendida en la sala festiva dal center da congress per in giantar cuminaivel. En ses pled da bainvegni ha Tazisius Caviezel, da preschent president

da Tavau, ditg che Hans Peter Michel saja in politicher cun in grond savair, ina anc pli gronda experientscha e lura er in um robust, ferm e cun ina pel dira. El saja dentant in vair muntagnard, tut en tut las meglras premissas per esser per in onn il pli aut «capricorn», ha ditg il Lumnezian, ch'è dapi in onn president da Tavau. Hans Peter Michel haja be tema da tschagula e dad agl e manegia schizunt che caots sajan er be umans, ha accentuà Tazisius Caviezel.

Sco dessert plets main serius

Anromada è la festa vegnida cun musica populara e sco dessert èn sche nus lain dir uschia vegnids servids plets main serius dals presidents da las fracziuns e dal president da la regenza Hansjörg Trachsel. El fa cunzunt quitads che cun Hans Peter Michel sco president dal cussegl grond e Duri Campell sco vicepresidente procurian ussa dus purs per la musica en il parlament grischun. Almain Hans Peter Michel haja gronda experientscha cun bif-

fels e bovs, (manegià ils caots dal FEM), ha ditg cun in surrir Hansjörg Trachsel. En num da la fracziun libra ha gratulà Renatus Casutt al nov president dal cussegl grond. Il deputà da Falera ha ditg che la populaziun saja savens betg cuntenta cun il parlament chantunal. In ami dad el haja cunzunt ina soluziun per ils Rumantschs. Quels avessan tuts da dislocar en Surses e lura fiss il problem pertutgant idioms schlià. Ses ami haja dentant er ina soluziun concernent ovras atomaras. Da Panaduz fin Sedrun fiss da far in lai per promover las ovras idraulicas e grazia a quel lai fissan er tuts ils problems pertutgant sviaments en Surselva schliads. Ultra da quai avessan tuts ils lieus pli auts en Surselva la meglra vista sin in lai.

Deputadas e deputads als gieus olimpics 2022

Andreas Thöny, il schef da fracziun da la Partida socialdemocratica, ha en ses pled mess en il center ils gieus olimpics d'en-

viern 2022. Quels hajan lieu a Minca ed enstagl da trametter ils meglers sportists a l'occurrenza mundiala fissi pli adattà da trametter deputadas e deputads a l'olimpiada 2022. Cun quel potenzial da deputadas e deputads saja da quintar cun intginas medaglias. Be en la disciplina bob saja quai pli grev cun avair cun deputà Ernst Nigg, sco franader, in um ideal per franadas. Marcus Caduff, da preschent schef da fracziun da la pcd, ha cusseglià a deputà Jon Domenic Parolini da prender cun el a Cuir ses chaun, sch'el veglia vegnir successur da Hansjörg Trachsel, per almain avair in ami. Andreas Felix, schef da fracziun da la pbd, è cuntent cun la tscherna da Hanspeter Michel e Duri Campell. Omadus sappian co e cura mulscher las vatgas. Rudolf Kunz, actualmain schef da fracziun da la pld, ha ditg ch'ils verd-liberals sajan sco tomatas: a l'entschatta verd e lura co-tschen. La fracziun libra (Freie Fraktion) saja bain per la gulp (Für Füchs), dentant cunter l'uors.



Trais deputadas da trais partidas: Elisabeth Mani, pbd, Agnes Brandenburger (pps), ed Annemarie Perl (pld) (da san.).



Dus deputads sursilvans cun in cusseglier guvernativ: Maurus Tomaschett, Renatus Casutt e Christian Rathgeb (da san.).



Deputà Vincent Augustin e vicari general Martin Grichting.



Tranter la prominenza er represchentants dal militar: Franz Nager, brigadier, Fritz Lier, divisiunari e Lucas Caduff, brigadier (da san.).